

Entrevista cu Sr. Jaime Mata:

Mañan ta Dia Nacional di Enseñanza y Educacion!



ORANJESTAD (AAN) -- Diaranzon 1 di Juli awor ta "Dia Nacional di Enseñanza y Educacion", cual ta worde celebra na Aruba pa dos aña consecutivo.

Pa duna informacion tocante e dia importante aki, DIARIO a entrevista señor Jaime Mata, presidente di Sindicato SIMAR, kende a relata kico e comision encarga ta organizando pa diaranzon awor.

Originalmente, introduccion di un fecha pa duna maestronan di Aruba un reconocimiento mereci, a nace den e seno di SIMAR.

Riba e pregunta di DIARIO tocante e iniciativa aki Sr. Mata a bisa:

"Cu exactitud mi no por bisa ki aña SIMAR a propone na Gobierno pa bin cu un Dia di Enseñanza. Loke si mi sa ta cu nos a propone esey bao di Gabinete Oduber. Nos peticion a sigui aden te na Gabinete Eman-II, y pesey nos ta hopi gradici na Ministro Eddy Croes e tempo ey, ken si a mira e necesidad pa berdad duna reconocimiento na maestronan.

Nos a scoge pa haci e riba dia 1 di Juli cu ta e fecha cu SIMAR a worde funda (por cierto e aña aki, SIMAR ta bay cumpli 29 aña di su fundacion).

Sinembargo, nos a keda un poco decepciona riba e peticion pasobra originalmente SIMAR a pidi pa e dia worde yama "Dia di Maestro" pero gobierno no a bay di acuerdo cune, y nan a yame 'Dia di Enseñanza y Educacion'. Nos di SIMAR a wak esey como un logro cabá, aunke nos lo persisti pa e number cambia pa -Dia di Maestro- pasobra mester

duna reconocimiento na e trabao di nos docentenan".

PROGRAMA 1998

Sr. Mata a menciona cu e celebracion pa e aña ki lo tuma lugar diaranzon mes, na sede di SIMAR pa 7.30 p.m. Esaki ta encera e siguiente programa:

Lo habri cu e notanan di nos Himno Nacional di Aruba. Seguidamente lo hiba palabra un representante di e directivanan di school, despues Ministro di Enseñanza Sra. Mary Wever-Lacle lo duna discurso, y finalmente Sr. Jaime Mata lo cera hibando palabra como Presidente di SIMAR.

"Despues di esey lo cuminsa cu dos charla informativo. E

prome ta na encargo di e economista Ben Marapin, ken lo papia riba e tema 'Economia y Educacion'.

E di dos orador ta Sra. Phyllis Stowe di YMCA, ken lo papia riba 'Servicio Comunitario y Educacion'. Despues di e dos charlanan tin e posibilidad pa preguntanan y discusion den e sala, y lo sigui pa e parti social caminda lo por tuma un brindis, y pa 11'or di anochi lo clausura e programa".

"INSTUIF DEPORTIVO"

Diadomingo 5 di juli lo tin un "Instuif Deportivo" unda tur maestro por participa.

"Esaki ta encera cu e maestronan por bin na Centro Deportivo Playa y entre 10'or di mainta cu 2'or di merdia e por haci cualkier deporte cu e kier haci. Simultaneamente lo tuma lugar un car rally cu ta cuminsa pa 11'or di mainta, pa termina 12'or di merdia. Salida ta dilanti Colegio Arubano pa bin bek Colegio na mesun caminda. Tambe riba tereno di Colegio mes lo tin BBQ y refresco. Nos ta calcula cu pa 3'or nos ta clausura e actividad aki".

PAKICO NO TIN UN DIA DI REFLEXION?

DIARIO a puntra Sr. Mata di con no a organiza un dia di reflexion pa maestronan, manera ta e caso na Vene-

zuela, entre otro paisnan, unda e dia ey no tin les.

"Ta asina aki cu tur e organizacion aki ta den man di un comision cu tin acceso na e directivanan di e diferente fundacionnan di school y sindicato SIMAR.

For di e comision a sali un peticion na Ministro pa duna su aporte y aprobacion pa nos haci e dia 1 di Juli un dia di reflexion caminda cu 900 maestro di Aruba lo a bin hunto na Seaport Conference Center, y di e manera ey por conoce coleganan di diferente tipo di enseñanza, y alavez comparti pensamiento y opinion riba innovacionnan cu ta tumando lugar e temponan aki y cu mester bin ainda, y tambe pa duna e maestronan e oportunidad pa desahoga nan mes riba diferente problema cu nan ta confronta diariamente den nan trabao como docente.

E peticion aki a worde rechaza pa Ministro di Enseñanza pasobra e no kier pa e fecha deservoca den un dia di no duna les. Di nos parti nos ta bay sigui haci intento pa un dia e fecha aki lo bira un dia di reflexion, loke nos ta haya hopi importante mes".

RIBA RECONOCIMIENTO PA MAESTRO

DIARIO a puntra Sr. Mata ta di con den e fecha aki cada school no ta duna recono-

cimiento na su maestronan di mayor trayectoria.

"Mi tin cu bisa cu den e Comision pa traha riba e fecha aki e pensamiento tey caba. Solamente nos ta pensa cu esaki ta un asunto di evolucion. Nos a ripara aña pasa cu maestronan no a participa masalmente, anto nos kier pa e participacion crece prome, ya cu no tin mucho sentido si un school ta haci algo asina y otronan no.

Lo nos bay na e reconocimentonan aki ora cada school lo tene su mesun programa riba e dia di enseñanza, unda por envolbe hunto alumno y maestronan".

INVITACION

Sr. Mata ta indica cu lo ta hopi importante si prensa local lo tey diaranzon awor y diadomingo 5 pa cubri e celebracion di Dia di Enseñanza y Educacion.

"Mi kier tambe haci un invitacion na tur maestro pa participa riba e dia tan importante aki, y di antemano felicita tur maestro di school riba dia 1 di Juli: Dia Nacional di Enseñanza y Educacion. Finalmente mi kier felicita e membresia di SIMAR riba nan 29 aña di existencia".

Pa nan 30 aña di existencia, otro aña, SIMAR lo acentua mas riba e historia di e Sindicato di Maestronan di Aruba.

Rondweg #1

DRIVE
motors n.v.

Tel: 837100

Quality pre - owned cars

1992	DODGE NEON	2DR	SD/AC	AFL.	15,000.--
1995	DODGE NEON	4DR	AT/AC	"	17,000.--
1996	DODGE NEON	4DR	AT/AC	"	17,500.--
1995	DAEWOO RACER GT1	4DR	AT/AC/PP	"	15,000.--
1997	SUZUKI ALTO 4-CYL.	4DR	SD/AC	"	15,000.--
1995	GEO STORM	2DR	SD/AC	"	15,000.--
1991	PONTIAC SUNBIRD	4DR	SD	"	10,000.--
1992	CHRYSLER NEW YORKER	4DR	AT/AC/PP	*	19,000.--
1997	SUZUKI MARUTI	4DR	SD/AC	"	10,500.--
1987	MERCEDES BENZ 300E	4DR	AT/AC/PP	"	30,000.--